

**Навечерие Рождества Христова  
На Господи возвах, глас 2:**

Приидите, возрадуемся Господеви, настоящую тайну сказующе: / средостение градежа разрушися, / пламенное оружие плещи даёт, / и Херувим отступает от древа жизни, / и аз райския пищи причащаюся, / от негоже произгнан бых преслушания ради; / неизменный бо образ Отчъ, / образ присносущия Его, / зрак раба приёмлет, / от Неискусобрачныя Матере прошед, / не преложение претерпев, / еже бо бе пребысть, Бог Сый истинен, / и еже не бе прият, Человек быв человеколюбия ради. / Тому возопийм: // рождейся от Девы Боже, помилуй нас.

Господу Иисусу рождшуся от Святыя Девы, / просветишася всяческая: / пастырем бо свиряющим и волхвом поклоняющимся, / Ангелом воспевающим, Ирод мятешся, / яко Бог во плоти явися, // Спас душ наших.

Царство Твоё, Христё Боже, / Царство всех веков, / и Владычество Твоё во всяком роде и роде, / воплотивыйся от Духа Святаго / и от Приснодевы Марии вочеловечивыйся, / свет нам возсия, Христё Боже, / Твоё пришествие; / Свет от Света, Отчее сияние, / всю тварь просветил еси, / всякое дыхание хвалит Тя. / Образ славы Отчия, / Сый, и прежде Сый, // и возсиявый от Девы, Боже, помилуй нас.

Что Тебе принесём, Христё, / яко явился еси на земли / яко Человек нас ради? / Какяждо бо от Тебе бывших тварей благодарение Тебе приносит: / Ангели – пение; небеса – звезду; / волсви – дары; пастырие – чудо; / земля – вертеп; пустыня – ясли; / мы же – Матерь Деву. // Иже прежде век, Боже, помилуй нас.

**Слава, и ныне, глас тойже:**

Августу единоначальствующу на земли, / многоначалие человеков преста; / и Тебе вочеловечшуся от Чистыя, / многобожие идолов упразднися, / под едином царством мирским гради быша, / и во Едино Владычество Божества языцы вероваша. / Написашася людие повелением кесаревым, / написаномся, вернии, Именем Божества, / Тебе, вочеловечшагося Бога нашего. // Велия Твоя милость, Господи, слава Тебе.